



Glygge-Zyttig vo de
JOKER WAGGIS

Usgoob 6 - im Septämber 2014

Events 2014

S'isch allewyy!
ebbis loos

SYTTE 2



Unter der Lupe

Der Busi

SYTTE 2



telebasel oder teleWaggis

wenn e TV-Sänder zem Sujet wird ...



E Hammer-Wätter, e Hammer-Waage, e Hammer-Sujet: JOKER WAGGIS, Joorgang 2014 ..

Draumhaft! Grandios! Gigantisch!
**Die Woort beschrybe sii wool
am beschte - d'Fasnacht 2014.**
**Denn sig's das Wätter, d'Pracht
vom neue Waage, oder der
grossartigi Zämmehalt bi de
JOKER WAGGIS - es isch vo A
bis Z e glungeni Fasnacht gsi.**
**Gärn bliggt me drum nomol
zrugg uff die drey scheenschte
Dääg und alles drum und dra ...**

Aagfange het d'Fasnacht 2014 fir
d'JOKER WAGGIS tradizioonell am
Samschtig vor der Basler Fasnacht -
em sog. Draggdoor-Samschtig.
Nachdäm me der Draggdoor bim
Buur iibernoo het, isch die erschti
Uusefoorderig vor der Diir ... oder
besser gsait, im Door gstande.

Schliesslig isch der neu Waage
nach Fertigstellig rund 35 cm braiter
gsi wie der Alt. Wäärend däm
s'Door nadyrlig unveränderet bliibe
isch.

Trotz der zuesätzlige Yyschränggig
het me der Waage gmainsam us
der Garage kenne rangiere

An der aaschliessende Waage-
Yyweihig, zämme mit Familie,
Frinde und Passiv-Mitglieder, hän
d'JOKER WAGGIS denn zem
erschte Mol der neu Waage könne
präsentiere.

Zue de Deen vo de Uelischränzer
het me gmainsam kenne uff e
Waage und d'Fasnacht aastosse.
D'Fasnacht het also kenne koo.

WYTER SYTTE 2

Miir JOKER WAGGIS bedangge uns fir die grossartigi Unterstitzig!

Es isch in der Daat e intensivs Joor
gsi fir d'JOKER WAGGIS. E Joor,
wie's verglichbar no kains gää het
in der doch scho lange Gschicht vo
dääre Glygge.

Doch nit numme miir Aggtive hän
im vergangene Fasnachts-Joor

Usserordentligs glaischtet, au unseri
Passiv-Mitglieder hän diversi Stunde
im Dienschd fir d'JOKER WAGGIS
verbrocht.

An dääre Stell mechte miir uns drum
nomol bi all unsere Familie,

Frinde, Gönner, Passiv-Mitglieder,
Hälfer, usw. bedangge. Ooni Euri
grossartigi Unterstitzig wär das
Fasnachts-Joor in däm Raame nit,
oder nur schwäär duurefierbar gsi.

Härzlige Dangg an Euch alli!

FORTSETZIG

Zwai Dääg speeter isch es denn au ändlig so wyt gsi. No e weeneli mied vo der Prattler Fasnacht und em Moorgestraich, het me sich zem Waagelaade besammelt. Kuum fertig glaade, isch es dirägt richtig Stadt gange. Der neu Waage, wo geege d'Sytte offe isch, het s'Mitfaare laider nimme zue gloo. So het sich der Gwäggi - unsere neue Faarer - elai mit Draggdoor und Waage uff e Wäg gmacht. Und d'JOKER WAGGIS hän sich ins Drämmli quätscht ...

Ändlig am Wettstaipplatz aakoo, sin d'JOKER WAGGIS bereits vom "Aahang" empfangen worde. Denn au am Fasnachts-Mäntig het's wiider ebbis zem Aastosse gää. Pungt 13:30 Uhr isch es denn ändlig uff d'Route gange. Nach de ganze Joor mit em alte Waage, sin die erschte Meter mit em neue, sytlig offene Waage scho e weeneli ungewoont gsi. Doch d'JOKER WAGGIS hän sich rächt schnäll an die neu Situazioon gweent.



JOKER WAGGIS - sälte uff em Waage ...

Die neu Freyhait, wo me sich scho syt ewige Zytte gwünscht het, isch jetzt ändlig Daatsach worde. Drum isch es au nit erstuunlig gsi, dass d'JOKER WAGGIS no mee Zyt nääbem Waage verbrocht hän ...

Am Fasnachts-Zyschtig sin denn wie allewyl die Glainschte zem Zug koo. Bereits zem 5. Mol isch im 2014 s'Binggis-Wägeli uff der Zyschtigs-Route unterwägs gsi. Nach em tradizioonelle Nachtässe am Rümelinsplatz isch speeter au s'Bar-Wägeli wiider im Ysatz gsi.

Und nadyrlig hän d'JOKER WAGGIS au im 2014 an der Birsig-Sinfonie - em Guggkonzäart hinter em Pickwick Pub - halt gmacht.

Am Fasnachts-Mittwuch isch denn no der zwaiti Cortège uff em Programm gstande. Wie allewyl e weeneli ruhiger als am Fasnachts-Mäntig, hän d'JOKER WAGGIS au no der letscht Fasnachts-Daag in Aagriff gno.

Au dää Daag isch nomol grandios gsi - mit em absolute Heehepunggt, wo s'teleBasel sogar der Cortège uffghalte het, numme dermit sii s'teleWaggis alias JOKER WAGGIS vor d'Linse griegt hän ...



... derfir meerhaitlig nääbedra aazdräffe!

Unter der Lupe: Der Busi

In dääre Rubrigg wird allewyl ai JOKER genauer voorgestellt. Diesmol nämme miir der BUSI unter d'Lupe:

72stunde: Wie alt bisch Du?

Busi: Sage mer's esoo, vor vier Joor bini no 30 gsi.

72stunde: Wo bisch Du dihim?

Busi: In Muttenz, em Grindigsoort vo de JOKER WAGGIS.

72stunde: Was machsch Du brueflig?

Busi: Das waiss niemer so genau. Der Loon wird aber Andi Monet vo DHL iiberwyysen.

72stunde: Was machsch Du in Diiner Freizyt?

Busi: Doo kunnt an erschter Stell mii Familie. Gfolgt vo de JOKER WAGGIS. Und dermit ich nie uff Fasnachts-Entzug kumm, bi ich no im OK Muttezer Fasnacht agktiv. Fasnacht isch schyyns mi Hobby!

72stunde: Syt wenn bisch Du bi de JOKER WAGGIS?

Busi: Ich ha im Joor 1999 s'erscht Mol mit de JOKER WAGGIS Fasnacht gmacht. Und syt denn kai ainzigs Mol usgloo!

72stunde: Wie bisch Du zue de JOKER WAGGIS gstoosse?



Busi: Bis zur Fasnacht 1998 sin d'JOKER WAGGIS no zu viert unterwägs gsi. Fir d'Fasnacht 1999 het me wyteri Mitglieder gsuecht. Doo het mii der Patrick - wo ich scho länger kennt ha - gfroogt, ob ich nit Luscht hätt. Nadyrlig ha ich miir das nit entgo loo ...

72stunde: Was isch Dii spezielli Funggzioon bi de JOKER WAGGIS?

Busi: Syt der letschte Fasnacht ha ich der Poschte vom Oobmaa deerfe iibernää. Das haisst, grundsätzlich alles e bitz. Aber v.a. Administrazioon, Kasse, Events, Passive, Glygge-Zyttig, usw.

72stunde: Weeles isch Dii scheenschti Fasnacht gsi?

Busi: Das ka me aigentlig gar nit vergliche. Aber miesst ich mi entschaide, wurd ich sage, d'Fasnacht 2014 deerft schwäär z'iiberdräffe syy: Das Hammer-Wätter, unsere neue Waage, dää enormi Zämmehalt ... und mi erschti Fasnacht als Oobmaa. Aifach sensazioonell!

72stunde: Und Dii scheenschts Erläbnis mit de JOKER WAGGIS?

Busi: Doo git's sooo vyl - es muess amme gar nit Speziells syy. Aifach als Glygge zämme syy und zämme feschte, das isch vyl wärt!

72stunde: Was sin Diini Wunsch fir d'Zuekunft bi de JOKER WAGGIS?

Busi: Ai Wunsch isch letscht Joor scho in Erfillig gange, wo mir ändlig unsere neue Waage baut hän. Sunscht winsch ich miir, no e mänggs Joor mit dääne Jungs kenne Fasnacht z'mache.

Härzlige Gliggwunsch!

Am 29. Auguscht 2014 isch es ändlig sowyt gsi, unsere Beni und d'Evyy hän sich s'Joowort gää!

Im wunderscheene Schloss Hallwyl het iiri Trauig stattgfunde - und im Raame vom aaschliessende Apero isch denn au s'Bild rächts entstande ...

Fir d'JOKER WAGGIS isch es e riise Eer gsi, dass me däa ainzigartig Daag het deerfe mit em Brutpaar verbringe. Us däm Grund bedange miir uns au nomol ganz härzlig bi dääne zwai und winsche iine alles Gueti fir die gmaisam Zuekunft.



Hän der Beni nit hänge loo: Michi, Stephan, Busi, Fäb, Galli und Stewi ...

Events 2014 - s'isch allewyy! ebbis los!

Nach em aasträngende Fasnachts-Joor 2014, hän d'JOKER WAGGIS s'neue Fasnachts-Joor 2015 ainiges ruhiger in Aagriff gno.

Statt grosse Ysätz am BaselTattoo, bim Ticketing oder Waagebau, hän bis jetz die diverse - zem Dail neue - Events vo sich reede loo.

Aagfange het's aigentlig no im vergangene Fasnachts-Joor. Am dritte Bummel-Sunntig hän sich d'JOKER WAGGIS zem tradizioonelle Bummel droffe. Fir



JOKER-Bummel 2014 unter em Motto "Miir dräffe sii".

d'Organisazioon vom Bummel isch bi de JOKER WAGGIS s'Bummel-OK zueständig. Das bestoot us zwai Mitgליider, ai Mitgליid dervo wird jeeedes Joor duur e anders ersetzt, so git's immer wiider neue Und im 2014 sin der Fäb und der Stephan doo derfir zueständig gsi.

Droffe het me sich berails am Vormittag bim Joggeli. Nach eme erschte glaine Apero isch es denn uff Liesbärg wyter gange zem Paintball.



JOKER WAGGIS am Muttenzer Banndaag 2014.

Wiider zrug in Basel, isch grad s'Nachtässe uff em Programm gstande, bevor me sich mit de Passiv-Mitgליider droffe het. Zämme het me sich uff e Fuesswäg zur

Staineschanze gmacht, wo bim teleBasel e Besichtigung vo de TV-Studios uff d'JOKER WAGGIS gwarte het. Kenne zueluege, was hinter de Kulisse laufft, isch seer spannend gsi. Speeter het me no in der Innerstadt gmaisam de letsche Fasnachts-Deen zueglost ...

Zum Start vom neue Fasnachts-Joor dräffe sich d'JOKER WAGGIS allewyy! am Muttenzer Banndaag. So isch das au am 29. Mai 2014 gsi. Grundsätzlich isch däa Termin zur Gselligkait doo - allerdings kenne's denn die Fasnachts-Verruggte maischtens nit loo, au no e glaini

Glygge-Sitzig druss z'mache. Doch au der sportlig Aspäggt soll nit z'kurz koo, drum lauffe die maischte Mitgליider gmaisam zum Gländ

uff em Muttenzer Sulzkopf und wiider zrug ins Dorf.

E wytere Event vo der sportlige Art isch im Frielig 2014 s'erscht Mol iiber d'Biini gange - der Kick'n'Grill. Dass es usgrächnet an däm Daag e Hitzerekoord gää wird, het me nit kenne aane. Doch der Termin isch fix gsi, also het me's duerezooge.



Kick'n'Grill - e Spass fir Gross und Glai.



Nadyrlig isch bi dääne Temperature kai langs Spiil meelig gsi. Und so het me sich relativ bald uff die zwait Hälfti konzentriert. Denn nach dääre Aasträngig het no e gmietlige Grill-Nomidaag uff alli Bedailigte gwarte.

Im Auguscht het denn au wiider der tradizioonell Grillplausch statt gfunde. Au das isch allewyy! e gmietlige Event, wo d'JOKER WAGGIS gän derzue yllaade.

Und bald kunnt scho wiider der alljeerlig Mässbummel - **s'isch also wirglig allewyy! ebbis los ...**